

27/10/2003

JKM sedia beri bantuan kepada negeri hadapi banjir

ALOR GAJAH: Jabatan Kebajikan Masyarakat (JKM) bersedia menghulurkan peruntukan tambahan kepada kerajaan negeri jika berlaku banjir teruk menjelang musim tengkujuh akhir tahun ini.

Menteri Perpaduan Negara dan Pembangunan Masyarakat, Datuk Seri Dr Siti

Zaharah Sulaiman, berkata pihaknya akan menyediakan peruntukan tambahan walaupun kos membiayai masalah banjir di setiap negeri sudah disediakan.

Bagaimanapun, peruntukan tambahan itu tidak terhad pada jumlah tertentu

bagi setiap negeri, sebaliknya mana-mana kawasan yang memerlukan kos tambahan boleh mengemukakan kepada JKM.

"Perubahan peruntukan bagi mangsa banjir adalah bergantung kepada batapa

teruknya kejadian di satu-satu kawasan, keperluan dan keadaannya yang berbeza seperti antara banjir di rumah penduduk dan sawah.

"Sekiranya ada permohonan tambahan di satu-satu kawasan, kita akan menggunakan peruntukan yang disediakan bagi negeri lain yang tidak menghadapi masalah banjir," katanya.

Beliau berkata demikian ketika diminta mengulas mengenai jumlah peruntukan kementeriannya mengenai persiapan kemungkinan banjir pada akhir tahun ini.

Bagaimanapun, beliau tidak menyatakan jumlah sebenar peruntukan tambahan yang disediakan.

Siti Zaharah sebelum itu menghadiri Jamuan Bersama Pemimpin Sempena Penyampaian Sumbangan Kepada Warga Emas Dan Anak Yatim Parlimen Alor Gajah, di Kompleks Japerun Masjid Tanah, dekat sini, semalam.

Terdahulu, dalam ucapannya, beliau berkata rakyat di negara ini perlu melihat kembali dan meneruskan dasar serta disiplin yang diperkenalkan oleh Perdana Menteri, Datuk Seri Dr Mahathir Mohamad sebelum ini.

Antaranya, termasuk disiplin kerja membabitkan kad perakam waktu dan tempoh minum petang.

Katanya, semua konsep yang diperkenalkan harus dihayati bagi mengawal pemikiran sekali gus mewujudkan daya saing dalam diri setiap individu yang

seterusnya membawa kejayaan kepada mereka.